

# Tchanson so Tohogne

par Remy NINANE

*(peut être chantée sur l'air «Le rêve de Drumont»)*

1.

Dispoye quéque tins, mès chérs amis,  
On fêt l'propagande en Bèlgike  
Po lès grandeûrs di nosse payis  
Çou qu'n'a d'pus bê, d'pus magnifike.  
Mins n'a-t-i mâye onk qu'àye pinsé  
A v'ni tchanter sins avou sogne  
Totes lès grâces è totes lès bêtés  
Dè charmant viyèdje di Tohogne.

2.

À mitan dè l'plèce n'a l'èglise  
Qui pout rivaliser, dji l'wèdje,  
Avou lès cisses di Houfalîhe,  
Di Nameûr ou bin di Bonêche.  
È so li d'zeûr, i n'a l'lêt'rèye  
Divant quî totes lès ôtes font l'trogne,  
Ca minme à Brussèle fât qu'on dèye :  
Vive todi l'lêt'rèye di Tohogne !

3.

Come hôteûr, nos avant " lès Monts "  
È c'ès'-t-one fâmeuse, qui l'arèdje !  
On l'veût di tos lès-environs  
È d'la vos comptez trinte viyèdjes.  
Nos avans dès fonds come Glawans,  
Dès bèlès plinnes come li Tchèvrogne,  
L'âkemince, Viné ou Inzèvà :  
N'èst-ce nin dès bês parcs po Tohogne ?

4.

Tos lès viyèdjes environants :  
Dèrbu, Jèn'rèt, Hamwèr, Verlinne,  
Boumâl ou Sy, Barvê, P'tit-Han,  
Sont k'nohou torto come dès rinnes.  
Lès bèlès souÿrces dè Nèblon  
Avou lès fâmeûses ruines di Logne ;  
Tot çoula fêt, cint nom di nom,  
Come on tchaplèt âtoû d'Tohogne.

5.

Vos p'lez d'hinde l'Rouwale dès pourcês  
Ou bin v'porminer Inte-deûs-Soyes,  
Vos rèscontrez dès vatches, dès vês,  
Dès dj'vâs, dès bèrbis ou dès poyes.  
C'èst dire qui lès cultivateûrs,  
Qui n'sont nin bin sûr dès ivrognes,  
Ont fêt l'ritchèsse è tot l'boneûr  
Di tote li comeune di Tohogne.

6.

Li patron d'honeûr sint Mårtin,  
Qui prêtchîve lès djins è lès biesses,  
A dit qu'falév' inmer s'prochin  
È qu'l'amoûr è l'union font l'fwèce.  
Ossi n'a nin dès mâlureûs,  
N'a nouk qui s'hé, n'a nouk qui brogne,  
I n'a vrémint qu'dès djins ureûs  
È bê p'tit viyèdje di Tohogne !